

二經同卷

張八

太上洞玄三洞開天風雷禹步制魔神呪

經

太上洞淵三昧帝心光明正印太極紫微

伏魔制鬼拯救惡道集福吉祥神呪

太上洞玄三洞開天風雷禹步制魔神呪經

爾時

昊天玉皇上帝在浩劫天宮玉虛殿內與諸

天諸地日月星宿飛天神王諸大菩薩天人

等演說開天風雷禹步制魔神呪經爾時

玉帝告水府扶桑大帝曰爾管下方地水二

氣吾觀水府多有妖龍蛟蜃妄興風雨飄蕩

人民地界虎狼蟲蛇野行壽命年深變成精

怪不歸正教遂其本性妄求淫祀恠亂人民

以要血食或強魔惡鬼橫殺眾生深可憐憫

汝當救之於是扶桑大帝上白

天帝曰賤臣職主二司不知眾生以何法救

之

上帝曰吾往昔不就王位捨其富貴修行八

百劫中頓悟大乘果證清淨自然覺王如來

教諸菩薩復經如是兩劫奉

元始符命得證浩劫天宮玉虛帝主開天理

地是時日月交蝕星辰失度各相吞并爭其

分野吾召八天雷神以伏眾星吾以神通鍊

之制禦魔王星宿神通莫測吾能使一雷神

手提太山移於他方吾能使一雷神口吞四

大海水了無消滴吾能使一雷神躡身十八

由旬口吞日月食諸星宿吾能使一雷神口

吐猛火徧諸世界焚燒妖魔皆歸正道所得

日月星宿各安其方守其分野星宿朗明始

分晝夜吾今分付汝三洞經錄可於凡世傳

修行有道之人所有雷神隨其實錄聽受符

命密呈速現擺撼乾坤之驗斬妖殺怪之

靈受持經錄之人常誦此呪增助雷神威光

付與雷神合其正道以契此心爾時

玉帝即說開天制魔神呪曰

五雷威神 與帝同生 受鍊玉帝

降伏眾星 猛吏萬隊 夜叉千羣

七頭百臂 巨口金精 身長萬丈

吞食鬼精 行有風雨 坐有雷霆

雷公霹靂 電母真靈 風雷鼓吹

天地皆驚 誅龍斬怪 日夜無停

千神拱手 萬神咸遵 五嶽五帝

四瀆源君 江河淮濟 十二溪兵

九地之下 泉曲幽冥 北都羅鄣

洞淵太冥 九天之上 日月星辰

飛天神王 一一咸聽 地司水府

明有鬼營 常行正令 育養羣生

敢有作過 符命所召 雷霆奉命

誅斬燒焚 威不可當 罪不可逃

列位九天 玉帝唱誦 神功赫赫

震怒揚威 斬妖殺怪 雷霆星飛

婆羅威震 膽利吹輝 復由陳旣

早鑑緋衣 鼓流微妙 南營擲衣

付煙石義 夜威斗中 須迎太王

阿奴上言 鼓千和母 嗔住阿鳥

輪輔明壽 奎避遠圖 福謠真易

雷霆隱諱 誦之萬遍 與神同契

光明日月 威神加備 壬癸亥子

常誦此經 神靈助祐 與道合真

